

بِسْمِ اللَّهِ الرَّحْمَنِ الرَّحِيمِ

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

01 Avril 2016 ~
(22 Jamad'ul Aakhir 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « [Khatam-an-Nabiyyine](#) et [La Venue de Bane Prophètes \(Partie 2\)](#)»:

KHATAM-AN-NABIYYINE ET LA VENUE DE BANE PROPHÈTES (PARTIE 2)

Samedi 26 Mars 2016 après Salaat-ul-Zuhr, ene camarade Musulman (non-Ahmadi) fine donne moi ene journal musulman (**STAR** No. 1625) daté du 21 au 27 Février 2016 kot là-dans ena ene l'article dans page 30 ki cause à propo de Sceau de la Prophécie (4^{ème} partie). Ene Imam (celui ki fine écrire sa l'article là) ti pé cause à propo l'accord ki tous bane Uléma de l'Ummah fine passer lor sa sujet de débat là. Li dire ki kan nous guette sa clause là, nous pou constaté ki, dès le premier siècle ziska azordi, dans sak génération successive, dans le monde musulman entier, dans sak pays, bane théologiens (savants) fine tombe d'accord lor sa point là ki après le Saint Prophète Hazrat Muhammad (saws) personne pas pou capave vine prophète, ki celui ki pou revendique le droit à sa poste là ou celui ki pou croire dans ene tel prétendant, li ene *Kaafir* (infidèle) et en dehors de l'Islam.

Alors Imam là fine reproduire bane preuves suivants, en l'occurrence bane l'opinions de sa bane savants là:

1. Hazrat Imam-e-Azam Abu Hanifa (ra) [ki fine né en 80 Hijri et mort en 150 Hijri] fine cause (couma mo ti dire zot Vendredi dernier) de « **La Nabi Ba'adi** » (Péna aucaine prophète après moi) [Manaqibul-Imamul Azam-e-Abu Hanifa, Labine-Ahmedul-Makki, Vol.1, p. 161]

2. Allama Ibné Jarir-Twabri (ra) [ki fine né en 224 Hijri et mort en 310 Hijri]; dans so bane commentaires du Saint Quran lor le verset « **Walakir-Rasulullah, wa Khatam-an-Nabiyyeen** » fine dire: *Celui ki fine ferme la porte de la venue de bane prophètes (de Nabuwwat) et fine mette ene scellé lor là.* [Tafsir Ibn Jarir, Vol.22 p. 12]
3. Allama Ibné Hazam (ra) de Andalousie [ki fine né en 384 Hijri et mort en 456 Hijri] fine écrire : « *Sans aucaine doute, la continuation de la révélation fine arrêter après la mort (Wafat) de Rassulullah (saws). La preuve c'est ki la révélation vini seulement à ene prophète et (li (saws)) le dernier de bane prophètes.* » [Al-Muhalla, Vol.1 p. 26]
4. Hazrat Imam Ghazali (ra) [ki fine né en 450 Hijri et mort en 505 Hijri] fine écrire dans so livre 'Iqtisaad': « *Sans aucaine doute l'Ummah fine comprend et tombe d'accord ki à travers bane mots 'Khatam-an-Nabiyyeen', 'La Nabiyya Ba'adi', pas pou ena aucaine Messenger ni aucaine Prophète (ki pou vini) ziska l'éternité.* »

Et ensuite Imam là fine cite bane les autres dimounes encore, pour prononcé ki le Saint Prophète (saws) li le dernier de bane prophètes et ki celui ki pou prétendre recevoir révélation divine ou ki li ene prophète, pou déclaré comme ene infidèle, *Kaafir*, et li fine mentionné ki dans sak pays musulman, bane grands savants, bane 'Fouqaha', bane 'Mouhaddicine' et bane 'Moufasserine' zot tous fine donne même l'opinion au sujet de « *Khatmé Nabouwwat* ».

Maintenant mo faire ene ti commentaire lor le sense du terme « *Khatam-an-Nabiyyeen* » et mo pou mette devant zot saki bane grands intellectuels musulmans fine dire lors sa sujet là.

Couma zot conné, le terme *Khatam-an-Nabiyyeen* apparaite dans Quran Shareef dans Surah Al-Ahzaab. Sa verset là dire:

« Muhammad pas papa d'aucaine de zot bane z'hommes, mais li le Messenger d'Allah, et le Khatam-an-Nabiyyeen (le Sceau de bane Prophètes) ; et Allah au courant de tout kitchoses. »
(33: 41)

Le Saint Prophète (saws) fine dire : « *Mo ti le Khatam-an-Nabiyyeen avant même ki le Prophète Adam fine né.* » (Tafsir ibn Kathir, lor l'autorité de Mousnad Ahmad ibné Hanbal).

Kan so garçon fine mort, li (saws) fine dire : « *Si Ibrahim ti vive, li ti pou vine ene Prophète.* » (Ibné Majah, Vol.1 Kitaabul-Janaiz).

Sa bane mots très significatifs là li en accord avec le texte du Quran Shareef. Par sa bane mots là pé rode dire ki le mot « *Khatam* » pas veut dire 'le dernier' par rapport à facteur lé temps.

- 1) Pendant discussion lor le sujet de la venue de bane prophètes et de Imaamat, ene grand savant respectable, le sixième Imaam de secte Shiite (bane Shia), ki ti vive pendant le premier siècle de l'islam (et mort en 148 Hijri/ 765 AD - L'ère Chrétienne), Hazrat Jafar Sadiq, ki la paix lor li, en commentant le verset Quran suivant: « **En vérité, Nous fine accorde le livre à bane zenfants d'Ibrahim...** » fine dire ki « *Allah fine accorde à bane zenfants d'Ibrahim bane Messagers, bane Prophètes et bane Imaams. Li ironique ki bane dimounes envie croire ki Allah fine béni bane zenfants d'Ibrahim mais selman zot refuse pou accepter ki sa bénédiction là étendre à bane descendants de Muhammad (saws).* »
- 2) Hazrat Maulana Jalalud-Din Rumi (ra), ene très grand saint ki considéré comme le soleil de bane les mondes mistik, et ki ti né en 604 Hijri/ 1207 AD, et fine mort en 672 Hijri/ 1273 AD, fine dire: « *Persévéré dans le chemin de la vertu afin ki zot béni par la prophécie (Nabuwwat) et ki zot reste en même temps ene disciple.* » (Mathnavi Maulana Rumi, Chapitre 1, p. 53)
- 3) Ene commentateur distingué de l'Espagne, le grand Sheikh Hazrat Muhyi-ud-Din Ibné Arabi (ki ti mort en 638 Hijri/ 1240 AD), fine dire : « *Bane prophètes pou vini parmi bane dimounes ziska la fin des temps malgré le fait ki la venue de bane prophètes de loi fine intèrrompu. Bane prophètes de loi zot seulement ene catégorie de bane prophètes.* »
- 4) Toujours d'après Sheikh Hazrat Muhyi-ud-Din Ibné Arabi, li fine dire : « *La grandeur du rang de Muhammad (saws) fine exprimé par le fait ki à travers la prière du 'Darood' li fine élève so propre descendance au rang de bane prophètes et ki li-même fine recevoir ene rang supérieur à celui de Ibrahim (as) par le fait ki la Loi ki li fine apporté zamais pou abolie.* » (Fatouhati Makkiyya, Vol.1 p.545).
- 5) Le chef de bane Mistik (du monde spirituel) et le Sheikh de so l'époque, Hazrat Sheikh Bali Afandi (ki ti mort en 960 Hijri), fine dire : « *Khatamar Rousoul c'est celui après ki, aucaine prophète porteur de loi pas pou né.* » (Sharah Fussussul Hakam).
- 6) Le Saint parmi bane saints, le Imam et le réformateur du deuxième siècle, Hazrat Sheikh Ahmad Farooqi de Sarhind (ki ti mort en 1034 Hijri/ 1624 AD) fine dire : « *La venue d'ene prophète après le Khatamar Rassoul Hazrat Muhammad (saws), le Choisi – ki la paix et bane bénédiction lor li – parmi so bane suivants et comme ene héritage, pas alle à l'encontre de so statut en tant ki Khatamar Rassoul. Donc, Ô bane lecteurs, pas vine parmi bane ki ena doutes.* » (Maktoubat Imam Rabbani Hazrat Mujaddid Alif Thani).
- 7) Hazrat Mirza Mazhar Jan-e-Janaan Naqshbandi (ki ti mort en 1195 Hijri/ 1781 AD), ene l'autorité ki reconnue lor bane zaffaires mistik (de lémonde spirituel), ene dimoune ki bien callé lor maîtrise de bane mots et ki ene maître connu de la poésie et de la prose, fine dire : « *Aucaine perfection, à l'exception de la perfection de bane prophètes de Loi, pas fine interrompue. Quant à bane bénédiction d'Allah, le Tout-Puissant, Li (Allah) ni avare ni radin (pingre).* » (Maqamati Mazhari, p. 88)
- 8) Hazrat Maulana Farangi Mahal, ki fine mort en 1304 Hijri, fine dire : « *Bane théologiens (savants) de la secte Sunni croire aussi et expose le fait ki au cours ministère du Saint*

Prophète Muhammad (saws), pas pou capave ena kit prophète porteur de loi ziska la fin des temps. Ene prophète ki pou apparaître pendant so ministère pou bizin nécessairement être ene suivant de la loi de Muhammad (saws). » (Majmou'ah Fatawa, Maulvi Abdul Hayyi, Vol.1, p. 144).

- 9) Hazrat Muhyi-ud-Din Ibné Arabi fine dire : « *À travers l'étude et la contemplation du 'Darood' nous fine arrive à la conclusion claire ki pou ena en vérité parmi bane musulmans bane dimounes ki zot statut, en matière d'apostola, pou élèver ziska rang de bane prophètes, Incha' Allah. Mais zot pas pou recevoir kit (nouvo) livre la loi. » (Fatouhati Makiyya, Vol.1. p. 545).*
- 10) Ummul Mominine Hazrat Aisha Siddiqa, l'épouse du Saint Prophète (saws) et tifille du premier Calife de l'Islam (ra) et ki universellement reconnue comme celui ki fine enseigne la moitié de la foi islamique à bane musulmans, fine dire : « *Ô ou bane musulmans ! Dire ki le Saint Prophète (saws) li le Khatam-an-Nabiyyeen mais zamais pas dire ki pas ena aucaine prophète après li. » (Durri-Manshur, Vol.5, p. 204).*
- 11) Sheikh-ul-Imaam, Ibn Qatibah (mort en 267 Hijri), après ki li fine cite la déclaration de Hazrat Aisha Siddiqa (ra), fine commenté : « *Sa déclaration (de Hazrat Aisha) là pas alle à l'encontre de saki le Saint Prophète (saws) fine dire, c'est-à-dire, « **La Nabi Ba'adi** » ; parski sa ki le Saint Prophète ti oulé rode dire vraiment c'est ki pas pou ena aucaine prophète ki pou vini après li ki pou abolir so code de Loi. » (Tawil Mukhtaliful Ahadith, p. 236).*
- 12) Le très renommé Muhaddith et intellectuel du subcontinent Indien, Imaam Muhammad Tahir (ki fine mort en 986 Hijri/ 1578 AD), fine dire : « *Sa l'opinion de Hazrat Aisha (ra) li basé lor la supposition ki pé attane Jésus (as) pou vini. Sa point de vue là aussi pas contredire bane dires du Saint Prophète (saws) : 'Pas ena aucaine prophète après moi.' Saki li ti rode dire c'est ki pas pou ena aucaine prophète après li ki pou abolir so la Loi. »*
- 13) Hazrat Shah Wali'oullah de Delhi (ki fine mort en 1176 AD) fine écrire : « *En considérant bane dires du Saint Prophète (saws) 'Laa Nabiyya Ba'adi' et 'Laa Rassool' nous comprend ki bane prophètes ki pas pou vini c'est (seulement) bane ki porteurs de Loi. » (Qiratoul Ainain Fi Tafadhouloul Shaïkhain, p. 39).*

Ena encore bane les autres références pou citer, toujours d'après bane grands intellectuels musulmans, lors zot interprétation de « *Khatam-an-Nabiyyeen* » et lor « *La Nabi Ba'adi* ».

Allah (swt) fine en plusse promette pou envoye dans sak siècle, ene Imaam pour faire revivre l'Islam, car la possibilité ki bane enseignements zot mal interprété ou ki bane dimounes carrément mette sa bane l'enseignements là de côté exister.

Ô ou bane musulmans ki croire dans le Messie Promis Hazrat Mirza Ghulam Ahmad (as) et dans sa humble serviteur et Khalifatullah de sa siècle là, zot bane témoins de l'accomplissement de sa promesse là. *Alhamdulillah*. Ki Allah guide nous toujours lors le droit chemin. *Ameen*.

L'ASSASSINAT D'ASAD SHAH SAHIB DANS L'ÉCOSSE

Jeudi dernier le 24 mars 2016, ene Musulman Ahmadi Asad Shah Sahib, 40 ans, ki originaire de Pakistan, de la ville de Rabwah et ki reste à Glasgo dans l'Écosse fine assassiné le soir vers les neuf heures, heure locale là-bas. Li fine retrouvé avec ene poignard dans la tête en dehors de so la boutique. Pour bane raisons au-delà de la perception et de la compréhension de bane l'autorités, li fine être brutalement poignardé (près de 30 coups de couteau) et sa dimoune ki fine attaque li là pas fine selman poignarde so la tête mais fine aussi piétine so la tête. Ene de bane frères de Asad Shah Sahib, ki ti pé travaille tout près, fine alerté par bane tapaze dehors et alors li fine sorti pour arrête sa dimoune ki ti pé attaque so frère là mais malheureusement li pas fine réussi. Li aussi fine bléssé kan li fine essaye sauve so frère. Asad Shah Sahib fine transporté à l'hôpital de l'université Queen Elizabeth kot li fine déclaré mort kan li fine arrive là-bas.

L'affaire pé suivre so cours et le présumé meurtrier, ene musulman, ki par la suite fine identifié comme Tanveer Ahmad, ki âgé de 32 ans, li soupçonné ki li fine voyagé de Bradford (dans le nord de l'Angleterre) pour Glasgo pour le seul motif pou touye Asad Shah Sahib et bane l'autorités écossais fine arrête li. Li pou passe en cours le 05 Avril 2016.

Pendant quelques l'année de cela, Asad Shah Sahib régulièrement en contacte avec moi, envoye moi so bane révélations par la poste et en plusse de sa, nous fine causé par téléphone 2 ou 3 fois plisse ki 1 heure de temps et aussi nous en contacte régulièrement par Internet (email), et même li ti bien chagrin ki en 2014, kan mo ti alle en Angleterre li pas ti au courant et li dire moi si li ti conné, li ti pou vine zoine moi et li ti désire travaille ensam avec moi. Dans sa l'année là, li dire moi ki Allah (swt) fine aussi élève li comme So serviteur choisi avec plusieurs titres et li prêt pou zoine ensam pour nous travaille ensam pour sa travail noble là. Sa c'est bane dernier conversation ki fine ena entre nous. Après sa, moi aussi mo fine occupé beaucoup, mais nous en contacte par messages internet.

Le Jamaat Ul Sahih Al Islam ainsi ki moi-même nous condamne sa acte barbare là et nous présente nos vives condoléances à famille de Asad Shah Sahib. **Innal-Lillahi wa Inna Ilayhi Rajiouna** (À Allah nous appartenir, et c'est vers Li le retour). Ki Allah préserve li (Asad Shah Sahib) toujours sous So l'ombraze et pardonne li et accorde à so famille la patience dans sa malheur terrible là et accorde zot ene récompense généreuse dans sa épreuve ki zot pé faire face là. *Ameen.*